

# Skanggipa Garo Hills Aquafest-ko Turaong-ata

## UIATTIMGIPAONI

**TURA:** Skanggipa changna Garo Hills Aquafest-ko Sukrobar salo Tura Police Parade Ground-o ong-ataha aro Garo Hills gimikoni sak ritichani riticha entrepreneurang aro na-tok jile cha-giparang ia dal-begipamaniao bak ra-angaha.

Meghalaya gimiko ian gnigipa Aquafest ong-a aro iana skang skanggipako Shillongo November 5 aro 7 tariko ong-atskaaha.

Ia Aquafest-ko Fisheries department, Meghalaya State Aquaculture Mission-ni ning-o Fisheries-ni a-bao development dongba-

anirangko mesok-parakata na aro Garo Hillsni na-tok jile cha-giparangna uamangni man-gipa na-tokrang palna-sim-na gita cholko miksonganio ong-ataha.

Salsana ong-atgipa Aquafest-o Fisheries

(Jak 7-ona ra-batanga...)

# Skanggipa Garo Hills Aquafest-ko....

(Jak 1-oni tong-sa...)

department aro IBDLP-ni Aquaculture Mission-ni ning-o na-tok jile cha-gipa partner-rang 2 metric tonrangna bate rim-daldal na-tokrangko dingtang dingtang stall-rango done mesokataha aro palataha. Na-tokrangko antidamrango palana komibata damrango palani gimin bang-a manderangan uarangko breangtokaha. Una agreba noko nitoatna jilgipa ba ornamental na-tokrang jekai Silver Arowana, Copper Oscar, Peacock Oscar, Flower Horn, Parrot fish, Red-tailed Shark, Silver shark aro dingtang dingtang rokomrangko Aquafest-o palna ra-baaha.

Parliamentary Secretary Noverfield R. Marak, dal-batgipa sokgipa ong-e ia Aquafest-ko a-bachengate on-aha aro South Turani MLA John Leslee K. Sangma-ba iano guest of honour ong-pae bakko ra-angpaaha.

Tom-anio Aquaculture Mission-ni sak bri partnerrang, North Garo Hills, Gokolgre-ni Mirjalin Marak, West Garo Hills Chengalgre-ni Koinath Marak, East Garo Hills, Songsak-ni Wilbirth N Marak, South Garo Hills, Chokpot-ni Winison Sangma-na aro South Garo Hill-sni Self-help Group dolsa Dakilcheng Kawagraha-na Fishery-ni a-bao nambate dakenganina certificate-rang baksa tangkarangko boksis on-aha.

Gipinrangna agreba Fisheries Departmentni Director Ma I R Sangma, Fisheries Information Officer, Shillong, S.R. Marak, West Garo Hillsni Deputy Commissioner Pravin Bakshi aro Superintendent of Fisheries, Tura R.B.R. Marak-maangba Aquafest-o dongpaaha.